

金匱玉函經

金匱玉函經卷第三

辨太陽病形證治下第四

問曰、病有結胸有藏結其狀何如答曰按之痛其脉寸口浮關上自沉爲結胃

問曰何謂藏結答曰如結胸狀飲食如故時小便不利陽脉浮關上細沉而緊爲藏結舌上白胎滑者爲難治

藏結者無陽證不往來寒熱一云寒而不熱其

人反靜舌上胎滑者不可攻也

夫病發於陽而反下之熱入因作結胸發于陰而反下之因作痞結胸者下之早故令結胸

結胸者其項亦強如柔痙狀下之卽和宜大陷胸圓

結胸證其脉浮大不可下下之卽死

結胸證悉具而躁者死

太陽病脉浮而動數浮則爲風數則爲熱動則

爲痛數則爲虛頭痛發熱微盜汗出而反惡寒者其表未解也醫反下之動數變遲頭痛則眩胃中空虛客氣動膈短氣煩躁心中懊懣陽氣內陷心下因堅則爲結胸大陷胸湯主之若不結胸但頭汗出其餘無汗劑頸而還小便不利身必發黃

傷寒六七日結胸熱實其脉浮緊心下痛按之如石堅大陷胸湯主之

傷寒十餘日熱結在裏復往來寒熱當與大柴胡湯但結胸無大熱此爲水結在胸脇頭微汗出大陷胸湯主之

太陽病重發其汗而復下之不大便五六日舌上燥而渴日晡小有潮熱從心下至少腹堅滿而痛不可近大陷胸湯主之

小結胸者正在心下按之卽痛其脉浮滑小陷胸湯主之

太陽病。二三日不能臥。但欲起者。心下必結。其
脉微弱者。此本寒也。而反下之。利止者。必結胸。
未止者。四五日復重下之。此挾熱利也。

太陽病下之。其脉促不結胸者。此爲欲解。其脉
浮者。必結胸。其脉緊者。必咽痛。其脉弦者。必兩
脅拘急。其脉細而數者。頭痛未止。其脉沉而緊
者。必欲嘔。其脉沉而滑者。挾熱利。其脉浮而滑
者。必下血。

病在陽當以汗解而反以水溼之若灌之其熱
被劫不得去益煩皮上粟起意欲飲水反不渴
服文蛤散若不差與五苓散若寒實結胸無熱
證者與三物小白散

太陽與少陽併病頭項強痛或眩時如結胸心
下痞而堅當刺大椎第一間肺俞肝俞慎不可
發汗發汗卽譫語譫語則脉弦譫語五六日不
止當刺期門

婦人中風發熱惡寒經水適來得之七八日熱除而脉遲身凉胸脅下滿如結胸狀其人譫語此爲熱入血室當刺期門隨其虛實而取之婦人中風七八日續得寒熱發作有時經水適斷者此爲熱入血室其血必結故使如瘧狀發作有時小柴胡湯主之

婦人傷寒發熱經水適來晝日明了暮則譫語如見鬼狀者此爲熱入血室無犯胃氣及上二

焦必當自愈

傷寒六七日發熱微惡寒肢節煩疼微嘔心下支結外證未去者柴胡桂枝湯主之

傷寒五六日已發汗而復下之胸脇滿微結小便不利渴而不嘔但頭汗出往來寒熱心煩此爲未解也柴胡桂枝乾姜湯主之

傷寒五六日頭汗出微惡寒手足冷心下滿口不欲食大便堅其脈細此爲陽微結必有表復

有裏沉亦爲病在裏汗出爲陽微假令純陰結
不得有外證悉入在于裏此爲半在外半在裏
脉雖沉緊不得爲少陰所以然者陰不得有汗
今頭汗出故知非少陰也可與小柴胡湯設不
了了者得尿而解

傷寒五六日嘔而發熱柴胡湯證具而以他藥
下之柴胡證仍在者復與柴胡湯此雖以下之
不爲逆必蒸蒸而振却發熱汗出而解若心下

滿而堅痛者此爲結胸大陷胸湯主之若但滿而不痛者此爲痞柴胡不復中與也半夏瀉心湯主之

太陽少陽併病而反下之結胸心下堅利復不止水漿不肯下其人必心煩

脉浮而緊而反下之緊反入裏則作痞按之自濡但氣痞耳

太陽中風下利嘔逆表解乃可攻之其人桡桡

汗出發作有時頭痛心下痞堅滿引脅下痛嘔
卽短氣此爲表解裏未和十棗湯主之

太陽病醫發其汗遂發熱惡寒復下之則心下
痞表裏俱虛陰陽氣併竭無陽則陰獨復加燒
鍼因胸煩面色青黃膚瞶如此者爲難治今色
微黃手足溫者易愈

心下痞按之濡其脉關上自浮大黃黃連瀉心
湯主之

金匱要略卷三
若心下痞而復惡寒汗出者附子瀉心湯主之
本以下之故心下痞與瀉心湯痞不解其人渴
而口燥煩小便不利者五苓散主之一方云忍
之一日乃愈

傷寒汗出解之後胃中不和心下痞堅乾噎食
臭脅下有水氣腹中雷鳴而利生姜瀉心湯主
之。

傷寒中風醫反下之其人下利日數十行穀不

化腹中雷鳴心下痞堅而滿乾嘔而煩不得安
醫見心下痞謂病不盡復下之其痞益甚此非
結熱但胃中虛客氣上逆故使之堅甘草瀉心
湯主之

傷寒服湯藥下利不止心下痞堅服瀉心湯已
復以他藥下之利不止醫以理中與之利益甚
理中者理中焦此利在下焦赤石脂禹餘糧湯
主之若不止者當利其小便

傷寒吐下後發汗虛煩脉甚微八九日心下痞
堅脇下痛氣上衝咽喉眩冒經脉動惕者久而
成痿

傷寒汗出若吐若下解後心下痞堅噫氣不除
者旋覆代赭石湯主之

太陽病外證未除而數下之遂挾熱而利不止
心下痞堅表裏不解者桂枝人參湯主之

大下以後不可更行桂枝湯若汗出而喘無大

熱者。可與麻黃杏仁甘草石膏湯。

傷寒大下後復發其汗。心下痞惡寒者表未解也。不可攻痞。當先解表。解乃可攻其痞。解表宜桂枝湯。攻痞宜大黃黃連瀉心湯。

傷寒發熱汗出不解。心下痞堅嘔吐下利者大柴胡湯主之。

病如桂枝證。頭不痛項不强。寸脉微浮。胸中痞堅。氣上衝咽喉不得息者。此爲胸有寒也。當吐。

之宜瓜蒂散

病者若脇下素有痞連在臍傍痛引少腹入陰
俠陰筋者此爲藏結死

傷寒若吐若下後七八日不解熱結在裏表裏
俱熱時時惡風大渴舌上乾燥而煩欲飲水數
升者白虎加人參湯主之

傷寒脉浮發熱無汗其表不解者不可與白虎
湯渴欲飲水無表證者白虎湯主之

凡用白虎湯。立夏後至立秋前得用之。立秋後不可服也。

春三月病常苦裏冷。白虎湯亦不可與。與之則嘔利而腹痛。

諸亡血虛家。亦不可與白虎湯。得之腹痛而利者。急當溫之。

太陽與少陽併病。心下痞堅。頭項強而眩。當刺大椎第一間。肺俞。肝俞。慎勿下之。

傷寒無大熱口燥渴而煩其背微惡寒者白虎
加人參湯主之

太陽與少陽合病自下利者與黃芩湯若嘔者
黃芩加半夏生薑湯主之

傷寒胸中有熱胃中有邪氣腹中痛欲嘔吐黃
連湯主之

傷寒八九日風溼相搏身體疼煩不能自轉側
不嘔不渴脉浮虛而澁者桂枝附子湯主之若

其人大便堅小便自利。朮附子湯主之。

風溼相搏。骨節疼煩。掣痛不得屈伸。近之則痛劇。汗出短氣。小便不利。惡風不欲去衣。或身微腫。甘草附子湯主之。

傷寒脉浮滑而表熱裏寒者。白通湯主之。舊云

白通湯一云白虎者恐非。舊云以下出叔和

傷寒脉結代。心中驚悸。炙甘草湯主之。

辨陽明病形證治第五

陽明之爲病胃家實是也

問曰病有太陽陽明有正陽陽明有微陽陽明何謂也答曰太陽陽明者脾約一作脾結是也正陽陽明者胃家實是也微陽陽明者發其汗若利其小便胃中燥大便難是也

問曰何緣得陽明病答曰太陽病發其汗若下之亡其津液胃中乾燥因轉屬陽明不更衣內實大便難者爲陽明病也

問曰陽明病外證云何答曰身熱汗出而不惡寒但反惡熱也

問曰病有得之一日不惡熱而惡寒者云何答曰然雖一日惡寒自罷卽汗出惡熱也

問曰惡寒何故自罷答曰陽明居中土也萬物所歸無所復傳始雖惡寒二日自止此爲陽明病也

本太陽初得病時發其汗汗先出不徹因轉屬

陽明也

病發熱無汗嘔不能食而反汗出濇濇然是爲
轉屬陽明

傷寒脉浮而緩手足自溫是爲繫在太陰太陰
身當發黃若小便自利者不能發黃至七八日
便堅爲屬陽明

傷寒轉繫陽明者其人濇濇然微汗出也

陽明中風口苦咽乾腹滿微喘發熱惡寒脉浮

緊若下之則腹滿小便難也

陽明病能食爲中風不能食爲中寒

陽明病中寒不能食而小便不利手足澼然汗出此欲作堅瘕必大便初堅後溏所以然者胃中冷水穀不別故也

陽明病初欲食食之小便反不數大便自調其人骨節疼翕翕如有熱狀奄然發狂澼然汗出而解此爲水不勝穀氣與汗共併脉緊卽愈

陽明病欲解時從申盡戌

陽明病不能食攻其熱必噦所以然者胃中虛冷故也其人本虛故攻其熱必噦

陽明病脉遲食難用飽飽卽發煩頭眩必小便難此欲作穀疸雖下之腹滿如故所以然者脉遲故也

陽明病久久而堅者陽明當多汗而反無汗其身如蟲行皮中之狀此以久虛故也

各陽明病。反無汗而但小便二三日嘔而欬手足若厥者。其人頭必痛若不嘔不欬手足不厥者其頭不痛

各陽明病但頭眩不惡寒故能食而欬其人咽必痛若不欬者其咽不痛

陽明病脉浮而緊其熱必潮發作有時但浮者必盜汗出

陽明病無汗小便不利心中懊懣者必發黃

陽明病被火額上微汗出小便不利者必發黃
陽明病口燥但欲漱水不欲嚥者必衄

陽明病本自汗出醫復重發汗病已瘥其人微
煩不了了者此大便堅也以亡精液胃中燥故
令其堅當問其小便日幾行若本日三四行今
日再行者知必大便不久出今爲小便數少津
液當還入胃中故知必當大便也

夫病陽多者熱下之則堅汗出多極發其汗亦

堅

傷寒嘔多。雖有陽明證不可攻之。

陽明病。心下堅滿。不可攻之。攻之遂利不止者。死。止者愈。

陽明病。面合赤色。不可攻之。攻之必發熱。色黃。小便不利也。

陽明病。不吐下而煩者。可與調胃承氣湯。

陽明病。其脉遲。雖汗出不惡寒者。其身必重。短。

氣腹滿而喘有潮熱如此者其外爲欲解可攻其裏也手足濇然汗出此爲已堅大承氣湯主之若汗出多微發熱惡寒者外爲未解其熱不潮未可與承氣湯若腹大滿不通者可與小承氣湯微和其胃氣勿令至大下

陽明病潮熱大便微堅者可與大承氣湯不堅者勿與之若不大便六七日恐有燥屎欲知之法可與小承氣湯湯入腹中轉矢氣者爲有燥

屎乃可攻之。若不轉矢氣者。此但頭堅後溏。不可攻之。攻之必脹滿不能食也。欲飲水者。與水卽噦。其後發潮熱。必復堅而少也。以小承氣湯和之。若不轉矢氣者。慎不可攻也。

夫實則譫語。虛則鄭聲。鄭聲者。重語是也。

直視譫語。喘滿者死。若下利者亦死。

發汗多。重發其汗。若已下復發其汗。亡其陽。譫語脉短者死。脉自和者不死。

傷寒吐下後不解不大便五六日上至十餘日
日晡時發潮熱不惡寒獨語如見鬼狀若劇者
發則不識人循衣撮空怵惕不安微喘直視脉
弦者生澁者死微者但發熱譫語者大承氣湯
主之若一服利止後服

陽明病其人多汗以津液外出胃中燥大便必
堅堅則譫語小承氣湯主之一服譫語止莫復
服

陽明病。譫語。發潮熱。其脉滑而疾者。小承氣湯主之。因與承氣湯一升。腹中轉矢氣者。復與一升。若不轉矢氣。勿更與之。明日不大便。脉反微澁者。裏虛也。爲難治。不可更與承氣湯也。

陽明病。譫語。有潮熱。而反不能食者。必有燥屎五六枚也。若能食者。但堅耳。大承氣湯主之。陽明病。下血。譫語者。此爲熱入血室。但頭汗出者。當刺期門。隨其實而瀉之。濺然汗出則愈。

汗出譫語者以有燥屎在胃中此爲風也須下之過經乃可下之下之若早語言必亂以表虛裏實故也下之則愈宜大承氣湯

傷寒四五日脉沉而喘滿沉爲在裏而反發其汗津液越出大便爲難表虛裏實久則譫語

三陽合病腹滿身重難以轉側口不仁而面垢譫語遺溺發汗則譫語甚下之則額上生汗手足厥冷若自汗出者白虎湯主之

二陽併病。太陽證罷。但發潮熱。手足漿漿汗出。大便難而譫語者。下之卽愈。宜大承氣湯。

陽明病。其脉浮緊。咽乾口苦。腹滿而喘。發熱汗出不惡寒。反惡熱。身重。發其汗。卽躁。心憤憤反譫語。加溫鍼。必怵惕煩躁。不得眠。下之卽胃中空虛。客氣動膈。心中懊懣。舌上胎者。梔子豉湯主之。若渴欲飲水。口乾舌燥者。白虎湯主之。若脉浮發熱。渴欲飲水。小便不利者。豬苓湯主之。

陽明病汗出多而渴者不可與豬苓湯以汗多
胃中燥豬苓湯復利其小便故也

脉浮而遲表熱裏寒下利清穀者四逆湯主之
若胃中虛冷其人不能食飲水卽噦

脉浮發熱口乾鼻燥能食者卽衄

陽明病下之其外有熱手足溫不結胸心中懊
懣饑不能食但頭汗出梔子豉湯主之

陽明病發潮熱大便溏小便自可而胸脅滿不

去者。小柴胡湯主之。

陽明病。脅下堅滿。不大便而嘔。舌上白胎者。可與小柴胡湯。上焦得通。津液得下。胃氣因和。身濇然汗出而解。

陽明中風。脈弦浮大。而短氣。腹都滿。脅下及心痛。久按之氣不通。鼻乾不得汗。其人嗜臥。一身及面目悉黃。小便難。有潮熱。時時噦。耳前後腫。刺之小差。其外不解。病過十日。脈續浮者。與小

柴胡湯但浮無餘證者與麻黃湯不溺腹滿加喘者不治

陽明病自汗出若發其汗小便自利此爲津液內竭雖堅不可攻之當須自欲大便宜密煎導而通之若土瓜根豬膽汁皆可爲導

陽明病其脉遲汗出多而微惡寒者表爲未解可發其汗宜桂枝湯

陽明病脉浮無汗其人必喘發其汗卽愈宜麻

黃湯主之。

陽明病發熱而汗出此爲熱越不能發黃也。但頭汗出身無汗齊頸而還小便不利渴引水漿此爲瘀熱在裏身必發黃茵陳湯主之。

陽明證其人喜忘者必有畜血所以然者本有久瘀血故令喜忘尿雖堅大便反易其色必黑抵當湯主之。

陽明病下之心中懊懣而煩胃中有燥屎者可

攻其人腹微滿頭堅後溏者不可攻之若有燥尿者宜大承氣湯

病者五六日不大便繞臍痛躁煩發作有時此爲有燥屎故使不大便也

病人煩熱汗出卽解復如瘧狀日晡所發熱者屬陽明也脉實者當下之脉浮虛者當發汗下之宜大承氣湯發汗宜桂枝湯

大下後六七日不大便煩不解腹滿痛者此有

燥屎。所以然者。本有宿食故也。大承氣湯主之。
病人小便不利。大便乍難乍易。時有微熱。喘冒。
不能臥者。有燥屎故也。大承氣湯主之。

食穀欲嘔者。屬陽明。吳茱萸湯主之。得湯反劇。
者。屬上焦。

太陽病。寸緩關小浮。尺弱。其人發熱汗出。復惡
寒。不嘔。但心下痞者。此以醫下之也。若不下其
人。復不惡寒而渴者。爲轉屬陽明。小便數者。大

便卽堅不更衣十日無所苦也渴欲飲水者少少與之但以法救之渴者宜五苓散

脉陽微而汗出少者爲自和汗出多者爲太過陽脉實因發其汗出多者亦爲太過太過者陽絕於內亡津液大便因堅

脉浮而芤浮則爲陽芤則爲陰浮芤相搏胃氣生熱其陽則絕

趺陽脉浮而澁浮則胃氣強澁則小便數浮澁

相搏。大便則堅。其脾爲約。麻子仁圓主之。

太陽病。三日。發其汗。不解。蒸蒸然發熱者。屬胃也。調胃承氣湯主之。

傷寒吐後。腹脹滿者。與調胃承氣湯。

太陽病。吐下發汗後。微煩。小便數。大便堅。可與小承氣湯和之愈。

得病二三日。脉弱。無太陽柴胡證。煩躁。心下堅至四五日。雖能食。以小承氣湯。少少與微和之。

令小安。至六日。與承氣湯一升。若不大便六七日。小便少者。雖不能食。但頭堅。後澇未定。成堅。攻之必澇。須小便利。屎定堅。乃可攻之。宜大承氣湯。

傷寒六七日。目中不了了。睛不和。無表裏證。大便難。身微熱者。此爲實。急下之。宜大承氣湯。陽明病。發熱汗多者。急下之。宜大承氣湯。發汗不解。腹滿痛者。急下之。宜大承氣湯。

腹滿不減。減不足言。當下之。宜大承氣湯。
傷寒腹滿。按之不痛者爲虛。痛者爲實。當下之。
舌黃未下者。下之黃自去。宜大承氣湯。
陽明與少陽合病。必下利。其脉不負者爲順。負
者爲失。互相尅賊。名爲負。若滑而數者。有宿食
也。當下之。宜大承氣湯。

病人無表裏證。發熱七八日。脉雖浮數者。可下
之。假令下已。脉數不解。合熱則消穀善饑。至六

七日不大便者有瘀血宜抵當湯若脉數不解而下不止必挾熱便膿血

傷寒七八日身黃如橘子色小便不利少腹微滿茵陳蒿湯主之

傷寒身黃發熱梔子檨皮湯主之

傷寒瘀熱在裏身必發黃宜麻黃連軹赤小豆湯主之

傷寒發其汗已身目爲黃所以然者以寒溼相

搏在裏不解故也。以爲非瘀熱而不可下。當于寒溼中求之。

辨少陽病形證治第六

少陽之爲病。口苦咽乾目眩也。

少陽中風。兩耳無聞。目赤胸中滿而煩。不可吐下。吐下卽悸而驚。

傷寒。脉弦細。頭痛發熱者。屬少陽。少陽不可發汗。發汗則譫語。此屬胃。胃和卽愈。胃不和則煩。

而悸

太陽病不解轉入少陽者脅下堅滿乾嘔不能
食飲往來寒熱尙未吐下其脉沉緊與小柴胡
湯若已吐下發汗溫鍼譫語柴胡證罷此爲壞
病知犯何逆以法治之

三陽合病脉浮大上關上但欲寐日合則汗
傷寒六七日無大熱其人躁煩此爲陽去入陰
也

傷寒三日。三陽爲盡。三陰當受邪。其人反能食而不嘔。此爲三陰不受邪也。

少陽病欲解時。從寅盡辰。

金匱玉函經卷第三

終

金匱玉函經卷第四

辨太陰病形證治第七

太陰之爲病。腹滿而吐。食不下。自利益甚。時腹自痛。若下之。必胸下痞堅。

太陰病。脉浮者。可發其汗。宜桂枝湯。

太陰中風。四肢煩疼。陽微陰澁而長者。爲欲愈。太陰病欲解時。從亥盡丑。

自利不渴者。屬太陰。以其藏有寒故也。當溫之。

宜四逆輩

傷寒脉浮而緩手足自溫者繫在太陰太陰當發身黃若小便自利者不能發黃至七八日雖暴煩下利日十餘行必自止所以然者此脾家實腐穢當去也

太陽病醫反下之因爾腹滿時痛者屬太陰也桂枝加芍藥湯主之大實痛者桂枝加大黃湯主之。

太陰爲病。脉弱。其人續自便利。設當行大黃芍藥者。宜減之。其人胃氣弱。易動故也。

下利先煎芍藥三沸

辨少陰病形證治第八

少陰之爲病。脉微細。但欲寐。

少陰病。欲吐不吐。心煩。但欲寐。五六日自利而渴者。屬少陰也。虛故引水自救。若其人小便色白者。爲少陰病形悉具。所以然者。以下焦虛有寒。不能制溲。故白也。

病人脉陰陽俱緊而反汗出爲亡陽此屬少陰
法當咽痛而復吐利

少陰病欬而下利譫語者被火氣劫故也小便
必難爲強責少陰汗也

少陰病脉細沉數病爲在裏不可發其汗

少陰病脉微不可發汗亡陽故也陽已虛尺中
弱澁者復不可下之

少陰病脉緊至七八日自下利其脉暴微手足

反溫脉緊去此爲欲解雖煩下利必自愈

少陰病下利若利自止惡寒而蹇手足溫者可治

少陰病惡寒而蹇時自煩欲去衣被者可治

少陰中風脉陽微陰浮爲欲愈

少陰病欲解時從子盡寅

少陰病八九日一身手足盡熱者以熱在膀胱
必便血也

少陰病吐利手足不逆冷反發熱者不死脉不至者灸少陰七壯

少陰病但厥無汗而強發之必動其血未知從何道出或從口鼻或從目出是名下厥上竭爲難治

少陰病惡寒身蹇而利手足逆冷者不治

少陰病下利止而頭眩時時自冒者死

少陰病吐利煩躁四逆者死

少陰病四逆惡寒而身踈脉不至不煩而躁者死。

少陰病六七日息高者死。

少陰病脉微細沉但欲臥汗出不煩自欲吐五六日自利復煩躁不得臥寐者死。

少陰病始得之反發熱脉沉者麻黃附子細辛湯主之。

少陰病得之二三日麻黃附子甘草湯微發汗。

以二三日無裏證故微發汗

少陰病得之二三日已上心中煩不得臥黃連
阿膠湯主之

少陰病得之一二日口中和其背惡寒者當灸
之附子湯主之

少陰病身體痛手足寒骨節痛脉沉一作微者附

子湯主之

少陰病下利便膿血桃花湯主之

少陰病二三日至四五日腹痛小便不利下利不止而便膿血桃花湯主之

少陰病下利便膿血者可刺

少陰病吐利而手足逆冷煩躁欲死者吳茱萸湯主之

少陰病下利咽痛胸滿心煩豬膚湯主之

少陰病二三日咽痛者可與甘草湯不差者與桔梗湯

少陰病咽中傷生瘡不能語言聲不出者苦酒湯主之

少陰病咽中痛半夏散及湯主之

少陰病下利白通湯主之

少陰病下利脉微服白通湯利不止厥逆無脉乾嘔煩者白通加豬膽汁湯主之服湯脉暴出者死微續者生

少陰病二三日不已至四五日腹痛小便不利

四肢沉重。疼痛而利。此爲有水氣。其人或欬或小便自利。或下利。或嘔者。眞武湯主之。

少陰病下利清穀。裏寒外熱。手足厥逆。脉微欲絕。身反不惡寒。其人面赤色。或腹痛。或乾嘔。或咽痛。或利止而脉不出。通脉四逆湯主之。

少陰病四逆。其人或欬或悸。或小便不利。或腹中痛。或泄利下重者。四逆散主之。

少陰病下利。六七日。欬而嘔。渴心煩不得眠者。

豬苓湯主之。

少陰病得之二三日。口燥咽乾者。急下之。宜大承氣湯。

少陰病下利清水。色純青。心下必痛。口乾燥者。急下之。宜大承氣湯。

少陰病六七日。腹脹不大便者。急下之。宜大承氣湯。

少陰病脉沉者。急溫之。宜四逆湯。

少陰病。飲食入口卽吐。心下噯噯欲吐。復不能吐。始得之。手足寒。脉弦遲者。此胸中實。不可下也。當吐之。若膈上有寒飲。乾嘔者。不可吐。急溫之。宜四逆湯。

少陰病。下利。脉微澁。嘔而汗出。必數更衣。反少者。當溫其上。灸之。脉經云。灸厥陰五十壯。

辨厥陰病形證治第九

厥陰之爲病。消渴。氣上撞心。心中疼熱。飢不欲

食甚者食則吐衄下之不肯止

厥陰中風其脉微浮爲欲愈不浮爲未愈

厥陰病欲解時從丑盡卯

厥陰病渴欲飲水者少少與之卽愈

辨厥利嘔噦病形證治第十

諸四逆厥者不可下之虛家亦然

傷寒先厥後發熱而利者必自止見厥復利

傷寒始發熱六日厥反九日而利凡厥利者當

不能食。今反能食。恐爲除中。食以索餅。不發熱者。知胃氣尙在。必愈。恐暴熱來出而復去也。後三日脉之。其熱續在。期之旦日夜半愈。後三日脉之而數。其熱不罷。此爲熱氣有餘。必發癰膿。傷寒脉遲。六七日而反與黃芩湯。徹其熱。脉遲爲寒。而與黃芩湯。復除其熱。腹中應冷。當不能食。今反能食。此爲除中。必死。

傷寒。先厥後發熱。下利必自止。而反汗出。咽中

痛者其喉爲痺發熱無汗而利必自止不止者必便膿血便膿血者其喉不痺

傷寒一二日至四五日而厥者必發熱前熱者後必厥厥深者熱亦深厥微者熱亦微厥應下之而反發其汗必口傷爛赤

凡厥者陰陽氣不相順接便爲厥厥者手足逆冷是也

傷寒病厥五日熱亦五日設六日當復厥不厥

者自愈。厥終不過五日。以熱五日。故知自愈。
傷寒。脉微而厥。至七八日。膚冷其人躁無暫安
時者。此爲藏厥。非蜺厥也。蜺厥者。其人當吐蜺。
今病者靜而復時煩。此爲藏寒。蜺上入膈。故煩。
須臾復止。得食而嘔。又煩者。蜺聞食臭。出其人。
當自吐蜺。蜺厥者。烏梅圓主之。

傷寒。熱少。厥微。指頭寒。嘿嘿不欲食。煩躁數日。
小便利。色白者。此熱除也。欲得食。其病爲愈。若

厥而嘔胃脅煩滿者其後必便血

病者手足厥冷言我不結胸小腹滿按之痛者此冷結在膀胱關元也

傷寒發熱四日厥反三日復熱四日厥少熱多其病當愈四日至七日熱不除必清膿血

傷寒厥四日熱反三日復厥五日其病爲進寒多熱少陽氣退故爲進

傷寒六七日其脉微手足厥冷煩躁灸厥陰厥

不還者死。

傷寒發熱下利厥逆躁不得臥者死。

傷寒六七日不便利忽發熱而利其人汗出不止者死。有陰無陽故也。

傷寒五六日不結胸腹濡脉虛復厥者不可下。此爲亡血下之死。

傷寒發熱而厥七日下利者爲難治。

傷寒脉促手足厥逆者可灸之。

傷寒脉滑而厥者裏有熱也白虎湯主之

手足厥寒脉爲之細絕當歸四逆湯主之若其
人內有久寒當歸四逆加吳茱萸生薑湯主之
大汗出熱不去內拘急四肢疼又下利厥逆而
惡寒者四逆湯主之

大汗出若大下利而厥冷者四逆湯主之

表熱裏寒者脉雖沉而遲手足微厥下利清穀
此裏寒也所以陰證亦有發熱者此表熱也

表寒裏熱者。脉必滑。身厥舌乾也。所以少陰惡寒而倦。此表寒也。時時自煩。不欲厚衣。此裏熱也。

病者手足厥冷。脉乍緊者。邪結在胸中心中滿而煩。饑不能食者。病在胸中。當吐之。宜瓜蒂散。傷寒厥而心下悸者。宜先治水。當與茯苓甘草湯。却治其厥。不爾。水漬入胃。必作利也。

傷寒六七日。大下後。寸脉沉遲。手足厥逆。下部

金匱要略卷四
脉不至咽喉不利唾膿血洩利不止者爲難治
麻黃升麻湯主之

傷寒四五日腹中痛若轉氣下趣少腹者爲欲
自利也

傷寒本自寒下醫復吐之寒格更逆吐下食入
卽出者乾薑黃芩黃連湯主之

下利有微熱而渴脉弱者自愈

下利脉數有微熱汗出者自愈設復緊爲未解

下利手足厥冷。無脉者。灸之不溫而脉不還。反微喘者死。

少陰負跌陽者爲順也。

下利寸脉反浮數。尺中自澁者。必清膿血。

下利清穀。不可攻其表。汗出必脹滿。

下利脉沉弦者。下重。脉大者爲未止。脉微弱數者。爲欲自止。雖發熱不死。

下利脉沉而遲。其人面少赤。身有微熱。下利清。

穀必鬱冒汗出而解病人必微厥所以然者其而戴陽下虛故也

下利脉反數而渴者今自愈設不差必清膿血以有熱故也

下利後其脉絕手足厥晬時脉還手足溫者生不還不溫者死

傷寒下利日十餘行脉反實者死

下利清穀裏寒外熱汗出而厥通脉四逆湯主

之。

熱利下重。白頭翁湯主之。

下利腹脹滿。身體疼痛。先溫其裏。乃攻其表。溫裏宜四逆湯。攻表宜桂枝湯。

下利欲飲水。爲有熱也。白頭翁湯主之。

下利譫語者。有燥屎也。宜小承氣湯。

下利後更煩。按之心下濡者。爲虛煩也。梔子豉湯主之。

嘔家有癰膿不可治嘔膿盡自愈

嘔而發熱者小柴胡湯主之

嘔而脉弱小便復利身有微熱見厥者難治四逆湯主之

乾嘔吐涎沫而復頭痛吳茱萸湯主之

傷寒大吐大下之極虛復極汗出者以其人外氣怫鬱復與之水以發其汗因得噦所以然者胃中寒冷故也

傷寒噦而腹滿。問其前後知何部不利。利之卽愈。

辨霍亂病形證治第十一

問曰。病有霍亂者何。答曰。嘔吐而利。名曰霍亂。問曰。病發熱。頭痛。身疼。惡寒。不復吐利。當屬何病。答曰。當爲霍亂。吐下利止。復更發熱也。

傷寒其脉微澁。本是霍亂。今是傷寒。却四五日。至陰經上。轉入陰。當利。本素嘔下利者。不治。若

其人似欲大便但反失氣而仍不利是爲屬陽明便必堅十三日愈所以然者經盡故也

下利後便當堅堅則能食者愈今反不能食至後經中頗能食復過一經能食過之一日當愈若不愈不屬陽明也

惡寒脉微而復利利止亡血也四逆加人參湯主之

霍亂頭痛發熱身疼痛熱多欲飲水五苓散主

之。寒多不用水者，理中湯主之。

吐利止而身痛不休者，當消息和解其外，宜桂枝湯小和之。

吐利，汗出發熱惡寒，四肢拘急，手足厥冷者，四逆湯主之。

既吐且利，小便復利而大汗出，下利清穀，裏寒外熱，脈微欲絕者，四逆湯主之。

吐已下斷，汗出而厥，四肢拘急不解，脈微欲絕。

者通脉四逆加豬膽汁湯主之

辨陰陽易差後勞復病形證治第十二

傷寒陰陽易之爲病其人身體重少氣少腹裏急或引陰中拘攣熱上衝胸頭重不欲舉眼中生花眼胞赤膝脛拘急燒裯散主之

大病差後勞復者枳實梔子湯主之若有宿食者加大黃如博碁子大五六枚

傷寒差已後更發熱者小柴胡湯主之脉浮者

以汗解之脉沉實者以下解之

大病差後從腰以下有水氣牡蠣澤瀉散主之
大病差後其人喜唾久不了了者胃上有寒當
溫之宜理中圓

傷寒解後虛羸少氣氣逆欲吐竹葉石膏湯主
之

傷寒脉已解而日暮微煩者以病新差人強與
穀脾胃氣尚弱不能消穀故令微煩損穀卽愈

吐下發汗後其人脉平而小煩者此新虛不勝穀氣故也

病後勞復發熱者麥門冬湯主之

金匱玉函經卷第四

終